

La Lia Rumantscha al 6avel Colloquium retoromanistich en il Friul

■ (lr) Dals 2 fin ils 4 d'october 2014 s'inscuntran linguists e scenziads da litteratura per la sisavla giada al Colloquium retoromanistich che ha lieu quella giada a Cormòns (Görz) en il Friul. Responsabla per l'organisaziun dal simposi retoromantsch è la Societât Filologjiche Furlane. La Lia Rumantscha (LR) vegn represchentada dal linguist Daniel Telli.

A las participantas ed als participants dal colloqui vegnan preschentads studis linguistics, istorics e culturals dal Grischun, da la Ladinia e dal Friul. Ils referents preschantan projects e ponderaziuns davart las relaziuns istoricas da quests trais territoris e novas scuvertas scientificas che collian las populaziuns en las regiuns retoromantschas.

La pli nova versiun dal Pledari Grond vegn preschentada

Per la LR vegn il linguist Daniel Telli ad esser da la partida. Ensemen cun *Claes Neufeind* da l'Universitad da Cologna vegn el a preschentar la nova versiun dal dicziunari online Pledari Grond. En il center dal referat stattan las pussaivladads da l'interacziun tranter ils utilisaders e la redacziun sco era las experientschas dals ultims sis mais. L'avrigl 2014 ha il Pledari Grond survegni in nov design. Quel pussibilitescha sper l'interacziun er ina tschertga bler pli sperta. Il Pledari Grond cuntogna actualmain var 221 000 endataziuns e vegn actualisà ed extendì mintga di. En pli vegn il Pledari Grond cumpletà pass per pass cun dicziunaris idiomatics e glossaris tematics.

Societât Filologjiche Furlane

La Societât Filologjiche Furlane è vegnida fundada il 1919 – pia exact il medem onn sco la Lia Rumantscha è vegnida fundada sco uniuin tetgala per las uniuns rumantschas. Ella s'engascha per la lingua mino-



Fatschada dal Palaç Mantica ad Udine, la sedia da la Societât Filologjiche Furlane.

FOTO SOCIETÂT FILOLOGJICHE FURLANE

ritara retoromantscha furlan e la cultura en la regiun. Il furlan è pli datiers dal ladin da las Dolomitas che dal talian. En il Friul

datti ultra da la populaziun furlana anc ina minoritad slovena e varsaquantas enclavas da lingua tudestga.